

巢

氏

病

療

重刊巢氏諸病源候總論卷三十一

癭瘤等病諸候

凡十五論

癭候

癭者由憂恚氣結所生亦曰飲沙冰沙隨氣入於脈搏頸下而成之初作與癭核相似而當頸下也皮寬不急垂槌槌然是也恚氣結成癭者但垂核槌槌無脈也飲沙水成癭者有核癭癭無根浮動在皮中又云有三種癭有血癭可破之有息肉癭可割之有氣癭可具針之

養生方云諸山水黑土中出泉流者不可久居常食令人作癭

病動氣增患

癰候

癰者皮中忽腫起初梅李大漸長大不痛不痒又不結強言癰結不散謂之爲癰不治乃至壘大則不復消不能殺人亦慎不可輒破

腦濕候

腦濕謂頭上忽生肉如角謂之腦濕言腦濕氣濕蒸衝擊所生也

黑痣候

黑痣者風邪搏於血氣變化生也夫人血氣充盛則皮膚潤悅不生疵瘕若虛損則黑痣變生然黑痣者是風邪變其血氣所生也若生而有之者非藥可治面及體生黑點爲黑痣亦云黑子

赤疵候

面及身體皮肉變赤與肉色不同或如手大或如錢大亦無痒痛謂之赤疵此亦是風邪搏於皮膚血氣不和所生也

白癥候

白癥者面及頸項身體皮肉色變白與肉色不同亦不痒痛謂

身...
卷三十一
二
之白癩此亦是風邪搏於皮膚血氣不和所生也

癩瘍候

癩瘍者人頸邊有曾前掖下自然斑剝點相連色微白而圓亦有烏色者亦無痛痒謂之癩瘍風此亦是風邪搏於皮膚血氣不和所生也

疣目候

疣目者人手足邊忽生如豆或如結筋或五個或十個相連肌裏粗強於血謂之疣目此亦是風邪搏於肌肉而變生也

鼠乳候

鼠乳者身面忽生肉如鼠乳之狀謂之鼠乳也此亦是風邪搏於肌肉而變生也

多忘候

多忘者心虛也心主血脈而藏於神若風邪乘於血氣使陰陽不和時相并隔乍虛乍實血氣相亂致心神虛損而多忘養生方云丈夫頭勿北首臥神魂不安多愁忘

嗜眠候

嗜眠者由人有腸胃大皮膚澀者則令分肉不開解其氣行則於陰而遲畱其陽氣不精神明爽昏塞故令嗜眠其湯熨針石

別有正方補養宣導今附於後

養生方導引法云踦踞交兩手內並腳中入且兩手急引之愈久寐精氣不明交腳踦踞凡故言踦踞以兩手從內屈腳中入左手從右趺跪上入左足隨孔下右手從左足跪上入右足隨孔下出抱兩腳急引兩手極引二通愈久寐精神不明久行則不睡長精明

又云一手拓頰向上極勢一手向後長舒急努四方顯乎當時俱極勢四七左右換手皆然拓頰手兩向共頭欹側身二七去臂膊風眠睡尋用永吉日康

鼾眠候

鼾眠者眠裏喉咽間有聲也人喉嚨氣上下也氣血若調雖寤寐不妨宣暢氣有不和則衝擊喉咽而作聲也其有肥人眠作聲者但肥人氣血沈厚迫隘喉間澀而不利亦作聲

體臭候

人有體氣不和使精液雜穢故令身體臭也其湯熨針石別有正方補養宣導今附於後

養生方云以手掩口鼻臨目微氣久許時手中生液速以手摩面日常行之使人體香

狐臭候

人腋下臭如葱豉之氣者亦言如狐狸之氣者故謂之狐臭此皆血氣不和蘊積故氣臭

漏腋候

腋下常濕仍臭生瘡謂之漏腋此亦是血氣不和爲風邪所搏津液蘊瘀故令濕臭

丹毒病諸候

凡十三論

丹候

丹者人身體忽然焮赤如丹塗之狀故謂之丹或發手足或發

腹上如手掌大皆風熱惡毒所爲重者亦有疽之類不急治則痛不可堪久乃壞爛去膿血數升若發於節間便入腸則殺人小兒得之最忌

白丹候

白丹者初發痒痛微虛腫如吹軫軫起不痛不赤而白色由挾風冷故使色白也

黑丹候

黑丹者初發亦痒痛或燥腫起微黑色由挾風冷故色黑也

赤丹候

赤丹者初發軫起大者如連錢小者如麻豆肉上粟如鷄冠肌理由風毒之腫故使赤也亦名茱萸丹

丹軫候

丹軫者肉色不變又不熱但起隱軫相連而微痒故謂爲丹軫也

室火丹候

室火丹候初發時必在腓腸如指大長三二寸瘦色赤而熱是也

天竈火丹候

天竈火丹發時必在於兩股裏漸引至陰頭而赤腫是也

廢竈火丹候

廢竈火丹發時必在足趺上而皮色赤者是也

尿竈火丹候

尿竈火丹發於曾腹及臍連陰頭皆赤是也

燍火丹候

燍火丹者發於臂亦在於背皮色赤是也

癘火丹候

癘火丹者發於脾而散走無常處著皮赤是也

螢火丹候

螢火丹者發於髀至脅皮赤是也

石火丹候

石火丹者發通身似纈目突如粟是也皮色青黑

腫病諸候

凡十七論

諸腫候

腫之生也皆由風邪寒熱毒氣客於經絡使血澀不通壅結皆成腫也其風邪不作者腫無頭無根浮在皮上如吹之狀也不赤不痛或腫或散不常腫其寒氣與血相搏作者有頭有根色

赤腫痛其熱毒作者亦無正頭但急腫久不消熱氣結盛壅則爲膿其候非一故謂之諸腫

風腫候

凡人忽發腫或著四支或在胷背或著頭項水牢如畔大虛腫
回回如吹之狀不痛不赤著四支者乃欲不遂令人煩滿短氣
身體寒冷皆由冬月遇溫風入人肌裏至春復適大寒風不得
出氣壅肌間不自覺至夏取風涼濕氣聚不散而成腫久不瘥
氣結盛生熱乃化爲膿血並皆爛敗則殺人右手關上脈浮而
虛者病腫

卒風腫候

人卒有腫不痛不赤移無常處而兼痒由先無患偶腠理虛而逢風所作也

風毒腫候

風毒腫者其先赤痛飈熱腫上生癩漿如火灼是也

毒腫候

毒腫之候與風腫不殊時令人吐熱其邪毒甚者入腹殺人

毒腫入腹候

此候與前毒腫不殊但言腫熱不盛入腹故也毒入腹之時先

令人勑嗇惡寒心煩悶而嘔逆氣急而腹滿如此者殺人

惡核腫候

惡核者內裏忽有核累累如梅李小如豆粒皮肉燥痛左右走身中卒然而起此風邪挾毒所成其亦似射工毒初得無常處多惻惻痛不卽治毒入腹煩悶惡寒卽殺人久不瘥則變作瘦

腫核候

凡腫挾風冷則不消而結成核也

氣腫候

氣腫者其狀如癰無頭虛腫色不變皮上急痛手纔著便卽痛

此風邪搏於氣所生也

氣痛候

人身忽然有一處痛如打不可堪耐亦乍走身間發作有時痛發則小熱痛靜便如冰霜所加故云氣痛亦由體虛受風邪所侵遇寒氣而折之邪氣不出故

惡脈候

惡脈者身裏忽有赤絡脈起龍嵒聚如死蚯蚓狀看如似有水在脈中長短皆逐其絡脈所生是也由春冬受惡風入絡脈中其血瘀結所生久不瘥緣脈結而成瘦

惡肉候

惡肉者身裏忽有肉如小豆突出細細長乃如牛馬乳亦如鷄冠之狀不痒不痛久不治長不已由春冬被惡風所傷風入肌肉結瘀血積而生也

腫有膿使潰候

腫壯熱結成此血化爲膿若不早出膿膿食筋爛骨則不可治也

膿潰後候

凡癰腫既潰訖膿汁須及時而盡若汁不盡還復結腫如初腫

之候無異卽稍難治

遊腫候

遊腫之候青黃赤白无復定色遊走皮膚之間肉上微光是也

日遊腫候

日遊腫其候與前遊腫相似但手近之微痛如復小痒爲異世言犯觸日遊神之所作

流腫候

流腫凡有兩候有熱有冷冷腫者其痛隱隱然沈深著臂髓在背上則腫起憑憑然而急痛若手按及針灸之卽腫起見也熱

腫者四支熱如火炙之狀移無常處或如手或如盤著背腹是
劇則皆熱如火徧身熠熠然五心煩熱唇口乾燥如注之狀此
皆風邪搏血氣所生以其移無常處故謂流腫

丁瘡病諸候

九十三論

丁瘡候

丁瘡者風邪毒氣於肌肉所生也凡有十種一者瘡頭烏而強
凹二者瘡頭白而腫實三者瘡頭如豆塗色四者瘡似葩紅色
五者瘡頭內有黑脈六者瘡頭赤紅而浮虛七者瘡頭葩而黃
八者瘡頭如金薄九者瘡頭如茱萸十者瘡頭如石榴子亦有

初如風軫氣搔破青黃汗出裏有赤黑脈而小腫亦有全不令人知忽以衣物觸及摸著則痛苦故取便不知處亦有肉突起如魚眼之狀赤黑慘痛徹骨久結皆變至爛成瘡瘡下深孔如大針穿之狀初作時突起如丁蓋故謂之丁瘡令人惡寒四皮強痛兼忉忉然牽疼一二日瘡便變焦黑色腫大光起根韌強全不得近酸痛皆其候也在手足頸面骨節間者最急其餘處則可也毒入腹則煩悶恍惚不佳或如醉患此者三二日便死養生方云人汗入諸食內食之作丁瘡

雄丁瘡候

雄丁瘡者大如錢孔烏靨似炙瘡四畔泡漿色赤又有赤粟乃言瘡而不腫刺之不痛而兼熱者名爲雄丁瘡

雌丁瘡候

雌丁瘡者頭小黃向裏靨亦似炙瘡四畔泡漿外赤火如錢孔而多汁腫而不痛瘡內有十字畫而兼冷者謂之雌丁瘡

紫色火赤丁瘡候

此瘡色紫赤如火之色卽謂紫色火赤丁瘡也

牛丁瘡候

牛丁瘡皮色不異但腫而頭黑挑之黃水出四邊赤似茱萸房

者名爲牛丁瘡也

魚臍丁瘡候

此瘡頭黑深破之黃水出四畔浮漿起狹長似魚臍故謂之魚臍丁瘡

赤根丁瘡候

瘡形狀如赤豆或生腋下如鴨子大者世人不識但見其赤卽謂之赤根丁瘡

犯丁瘡候

犯丁瘡謂丁瘡欲瘥更犯觸之若大噀及食豬魚麻子并狐臭

人氣熏之皆能觸犯之則更極乃甚於初更令熱熾腫先寒後熱四支沈重頭痛心驚嘔逆煩悶則不可治

丁瘡腫候

丁瘡腫謂此瘡熱氣乘之與寒毒相搏而成腫

犯丁瘡腫候

犯丁瘡腫謂瘡腫欲瘥更犯觸之瘡勢轉劇乃甚於初或腫熱疼掣或心悶恍惚或四支沈重或嘔逆煩心此皆犯瘡之候多能殺人

丁腫候

此猶是丁瘡而帶焮腫而無根者也

丁瘡久不瘥候

瘡久不瘥謂此丁瘡膿汁不止亦平陷不滿皆由過冷所作也

犯丁瘡候

犯丁腫謂病丁腫而或飲食或居處觸犯之令腫增極也

重刊巢氏諸病源候總論卷三十一終

重刊巢氏諸病源候總論卷三十二

癰疽病諸候上

凡十六論

癰候

癰者由六府不和所生也六府主表氣行經絡而浮若喜怒不測飲食不節陰陽不調則六府不和榮衛虛者腠理則開寒客於經絡之間經絡爲寒所折則榮衛稽留於脈榮者血也衛者氣也榮血得寒則澀而不行衛氣從之與寒相搏亦壅遏不通氣者陽也陽氣蘊積則生於熱寒熱不散故聚積成癰府氣浮行主表故癰浮淺皮薄以澤夕則熱勝於寒熱氣蘊積傷肉而

敗肌故血肉腐壞化而爲膿其患在表浮淺則骨髓不焦枯府藏不傷敗故可治而愈也又少苦消渴年四十已外多發癰疽所以然者體虛熱而榮衛否澀故也有鬲痰而渴者年盛必作黃疽此脾胃虛熱故也年衰亦發癰疼府藏虛熱血氣否澀故也又腫一寸至二寸癰也二寸至五寸癰也五寸至一尺癰疽也一尺至三尺者名曰竟體癰癰成九竅皆出諸氣憤鬱不遂志欲者血氣畜積多發此疾診其寸口脈外結者癰腫腎脈瀼甚爲大癰脈滑而數滑卽爲實數卽爲熱滑卽爲榮數卽爲衛榮衛相逢則結爲癰熱之所過卽爲膿也脈弱而數者此爲戰

寒必發癰腫脈浮而數身體無熱其形默默者胃中微躁不知痛所在此主當發癰腫脈來細而沈時直者身有癰腫若腹中有伏梁脈肺肝俱到卽發癰疽四支沈重肺脈多卽死凡癰疽脈洪麤難治脈微澀者易愈諸浮數之脈應當發熱而反沈淅惡寒若痛處當有癰也此或附骨有膿也脈弦洪相薄外內急熱故欲發癰疽凡發癰腫高者疹源淺腫下者疹源深大熱者易治小熱者難治初便大痛傷肌晚乃大痛傷骨諸癰發於節者不可治也發於陽者百日死發於陰者四十日死也尻太陽脈有腫癰在足心少陽脈八日死發臙血八日死頭陽明脈

有腫癰在尻六日死發膿血六十日死服太陽有腫癰在足太陽七十日死發膿血者百日死轉太陽太陰脈有腫癰在脛八日死發膿血四百日死足少陽脈有腫癰在脇八日死發膿血六百日死手陽明脈有腫癰在腋淵一歲死發膿血二歲死發腫牢如石走皮中無根癰也久久不消因得他熱乘之時有發者亦爲癰也又手心主之脈氣發有癰腫在股脛六日死發膿血六十日死又有癰在腓腸中九日死也

養生方云五月勿食不成核菓及桃棗發癰癰不爾發寒熱變爲黃疸又爲泄利

又云人汗入諸食中食之則作丁瘡癰癤等

癰有膿候

此由寒氣搏於肌肉折於血氣結聚乃成癰凡癰經久不復可消者若按之都牢韌者未有膿也按之半韌半軟者有膿也又以手掩腫上不熱者爲無膿若熱甚者爲有膿凡覺有膿宜急破之不爾侵食筋骨也

癰潰後候

此由寒氣客於肌肉折於血氣結聚乃成癰凡破癰潰之後有逆有順其眼白睛青黑而眼小者一逆也丙藥而嘔二逆也傷

痛渴甚者三逆也。躄項中不便者四逆也。音嘶色脫者五逆也。除此者並爲順也。此五種皆死候。凡發癰疽則熱流入內五藏。焦燥者渴而引飲。兼多取冷則腸胃受冷而變。下利利則腸胃俱虛而冷搏於胃。氣逆則變嘔。逆氣不通遇冷折之則變噦也。

石癰候

石癰者亦是寒氣客於肌肉折於血氣結聚所成其腫結癰實至牢有根核皮相親不甚熱微痛熱時自歇此寒多熱少。如石故謂之石癰也。久久熱氣乘之乃有膿也。

附骨癰腫候

附骨癰亦由體癰熱而當風取涼風冷入於肌肉與熱氣相搏
伏結近骨成癰其狀無頭但腫痛而闊其皮薄澤謂之附骨癰
也

癰虛熱候

此是寒客於經絡使血氣否澀乃結腫成癰熱氣壅結則血化
爲膿膿潰癰瘡之後餘熱未盡而血氣已虛其人噲噲卒熱愒
愒虛乏故謂之虛熱

癰煩渴候

癰由寒搏於血血澀不通而熱歸之壅結所成熱氣不得宣泄

內熏五藏故煩躁而渴凡癰腫熱渴引飲冷氣入腸胃卽變下痢并變嘔噦所以然者本內虛熱氣逆故嘔嘔而氣逆外冷乘之氣不通故噦也

發癰欬嗽候

夫肺主氣候於皮毛氣虛腠理受寒寒客經絡則血否澀熱氣乘之則結成癰也肺氣虛寒寒復乘肺成於寒則成欬嗽故發癰而嗽也

癰下利候

此由寒氣客於經絡折於氣血壅結不通結成癰腫發癰而利

者由內熱而引飲取冷太過冷入腸胃故令下利也下利不止則變嘔噦所以然者脾與胃合俱象土脾候身之肌肉胃爲水穀之海脾虛肌肉受邪胃虛則變下利下利不止則變嘔噦也

發癰大小便不通候

此由寒客於經絡寒搏於血血澀不通壅結成癰藏熱不泄熱入大小腸故大小便不通

發癰內虛心驚候

此由體虛受寒寒客於經絡血脈否澀熱氣蘊積結聚成癰結熱不敗熱氣內迫於心故心虛熱則驚不定也

癰腫久愈汁不絕候

此由寒客於經絡則血澀不通與寒相搏則結成癰腫熱氣乘之則血化爲膿膿潰之後熱腫乃散餘寒不盡肌肉未生故有惡液澳汁清而色黃不絕也

癰瘡後重發候

此由寒氣客於經絡血澀不通壅結成癰凡癰膿潰之後須著排膿藥令熱毒膿血俱散盡若有惡肉亦傳藥食之則好肉得生真氣得復若膿血未盡猶挾餘毒瘡口便合當時雖瘡而後終更發

久癱候

此由寒氣客於經絡血澀不通壅結成癱發癱之後熱毒未盡
重有風冷乘之冷搏於腫蘊結不消故經久一瘥一發久則變
成癩也

疽候

疽者五藏不調所生也五藏主裏氣行經絡而沈若喜怒不測
飲食不節陰陽不和則五藏不調榮衛虛者腠理則開寒客經
絡之間經絡爲寒所折則榮衛稽留於脈榮者血也衛者氣也
榮血得寒則澀而不行衛氣從之與寒相搏亦澀滯不通氣者

陽也陽氣蘊積則生於熱寒熱不散故積聚成疽藏氣沈行主裏故疽腫深厚其上皮強如牛領之皮久則熱勝於寒熱氣滯盛蘊結傷肉也血肉腐壞化而爲膿乃至傷骨爛筋不可治而死也又少苦消渴年至四十已上多發癰疽所以然者體虛熱而榮衛否澀故也又有鬲痰而渴者年盛必作黃疽此由脾胃虛熱故也年衰亦發癰疽藏虛血氣否澀故也又腫一寸至二寸癰也二寸至五寸癰也五寸至一尺癰疽也一尺至三尺者名曰竟體癰癰成九竅皆血諸氣憤鬱不遂志欲者血氣畜積多發此疾診其脈弦洪相薄外急內熱欲發癰疽脈來細而沈

時直者身有癰腫若腹中有伏梁脈肺肝俱到卽發癰疽四支
沈重肺脈多卽死凡癰疽脈洪麤難治脈微澀者易愈諸浮數
之脈應當發熱而反洗淅惡寒若痛處當有癰也此或附骨有
膿也身有五部伏菟一腓二背三五藏之俞四項五五部有疽
者死又疽發於噤中名曰猛疽猛疽不治化爲膿膿不瀉塞咽
半日死其化作膿瀉之則已發於頸名曰腋疽其腫大以赤黑
不急治則熱氣下入腋淵前傷任脈內熏肝肺熏肝肺十餘日
而死傷陽氣大發消澀留項名曰腦鑠其色不鑠項痛而刺以
鍼煩心者死不可治發於髀及臍名曰疵疽其狀赤黑急治之

此令人汗出至足不害五藏發癰四五日燉熯之也發於腋下
赤靨者名曰米疽也靨而不潰者爲馬刀也發於胃名曰井疽
也其狀如大豆日三四起不早治下入腹中不治十日死發於
膺名曰甘疽其狀如穀實瓠瓜常苦寒熱急治之去其寒熱不
治十歲死死後出膿發於股陽名曰兌疽其狀不甚變而膿附
骨不急治四十日死發於脅名曰改訾者女子之病也又云癰
發女子陰傍名曰改訾疽久不治其中生息肉如赤小豆豚黍
也發於尻名曰兌疽其狀赤靨大急治之不治四十日死若發
尻尾名曰兌疽若不急治便通洞一身十日死發於股陰名曰

赤施不急治之六日死在兩股內者不治六十日當死發於膝
名曰疵疽其狀大癰色不變寒熱而穿物石石之則死須其色
黑柔乃石之生也發於脛名曰兔齧疽其狀赤至骨急治之不
治害人也發於踝名曰走緩色不變數灸而止其寒熱不死發
於足上下名曰四淫不急治之百日死發於足傍名曰癘疽其
狀不大初小指發急治之其狀黑者不可消百日死也發於足
趾名曰兌疽其狀赤黑不死治之不衰急斬去之活
也不斬者死矣

赤疽發額不瀉十餘日死其五日可刺也其膿赤多血死未

有膿可治八年二十五三十一六十九五百神皆在額不可見血見血者死 赤疽發身腫牢核而身熱不可以坐不可以行不可以屈伸成膿刺之卽已 赤疽發胷可治赤疽發髀樞六月內可治不治出歲死 赤疽發陰股牢者死濡者可治赤疽發掌中可治 赤疽發脛死不可治 白疽發髀若肘後痒目痛傷精及身熱多汗五六處死 黑疽發腫居背太骨上八日可刺也過時不刺爲骨疽骨疽膿出不可止者出碎骨六十日死 黑疽發腋淵死 黑疽發耳中如米此名文疽死 黑疽發髀死 黑疽發缺盆中名曰伏癰死 黑疽發肘上下

不死可治 黑疽發腓腸死 黑疽發膝臏牢者死濡者可治

黑疽發趺上牢者死 倉疽發身痒後痛此故傷寒氣入藏

篤發爲倉疽九日可治九十日死 釘疽發兩髀此起有所逐

惡血結畱內外榮衛不通發爲釘疽三日身腫痛甚口噤如瘞

狀十一日可刺不治二十日死疽起於肉上如丁蓋下有腳至

骨名釘疽也 鋒疽發背起心俞若髀髀二十日不瀉死其八

日可刺也其色赤或膿見青者死不治人年六十八二十四四

十五十六六十七六十二九十八神皆在髀不可見血見血必

死 陰疽發髀若陰股如發腰強內不能自止數飲不能多五

日牢痛如此不治三歲死刺疽發起肺俞若肝俞不瀉一十日
死其八日可刺也發而赤其上肉如椒子者死不可治人年十
九二十五三十三四十九五十七六十七三十八十一九十七
神皆在背不可見血見血者死 脈疽發環項始病身隨而熱
不欲動悄悄或不能食此有所大畏恐怖而不精上氣嗽其發
引耳不可以腫二十日可刺如不刺八十日死 龍疽發背起
胃俞若腎俞二十日不瀉死九日可刺其上赤下黑若青黑者
死發血膿者不死 首疽發背發熱八十日大熱汗頭引身盡
如嗽身熱同同如沸者皮澤頗腫處淺刺之不刺入腹中二十

日死 俠榮疽發脅起若兩肘頭二十五日不瀉死其九日可
刺發赤白間其膿多白而無赤可治也人年一十六二十六三
十二四十八五十八六十四八十九十六神皆在脅不可見血
見血者死 勇疽發股起太陰若伏兔二十五日不瀉死其十
日可刺勇疽發清膿赤黑死白者尙可治人年十一十五二十
三十一三十二四十六五十九六十三七十五九十一神皆在
尻尾不可見血見血者死 標叔疽熱同同耳聾後六十日腫
如腫水狀如此可刺之但出水後乃有血血出卽除也人年五
十七六十五七十三八十一九十七神皆在背不可見血見血

者死 癆疽發足趺若足下三十日不瀉死其二十日可刺癆
疽發赤白膿而不多其上痒赤黑死不可治人年十三二十
九三十五六十一七十三九十三神皆在足不可見血見血者
死 衝疽發在小腹痛而戰寒熱冒五日帽帽六日而變可刺
之五十日死敦敦疽發兩指頭若五指頭十八日而瀉死其四
日可刺其發而黑癰不甚赤過節可治也 疥疽發腋下若臂
兩掌中振寒熱而隘乾者飲多卽嘔煩心帽帽六卒胗者如此
可汗不汗者死 筋疽發背俠脊兩邊大筋其色蒼八日可刺
也

陳乾疽發臂三四日痛不可動五十日身熱而赤六十日可刺之如刺之肺無血三四日病已蚤疽發乎足五指頭起節色不變十日之內可刺也過時不刺後爲食癰在腋三歲死

養生方云銅器蓋食汗入食食之令人發惡瘡內疽

又云鯽魚膾合豬肝肺食之發疽 又云烏鷄肉合食發疽

又云魚腹內有白如膏合烏鷄肉食之亦發疽也 又云魚金

鯽食發疽也 又云已醉強飽食不幸發疽其湯熨針石別有

正方補養宣導今附於後

養生方導引法云正倚壁不息行氣從頭至足止愈疽行氣者

鼻內息五入方一吐爲一通滿十二通愈

又云正坐倚壁不息行氣從口輒令氣至頭而止治疽痺氣不足

疽潰後候

此由寒氣客於經絡折於氣血血澀不通乃成疽發疽潰之後有逆有順其眼白睛青黑而眼小者一逆也內藥而嘔者二逆也傷痛渴甚者三逆也轉項中不便者四逆也音嘶色脫者五逆也除此者並爲順矣此五種皆死候凡發癰疽則熱流入五藏焦燥渴而引飲兼多取冷則腸胃受冷而變下利利則腸胃

俱虛而冷搏胃氣氣逆則變嘔逆氣不通遇冷折之則噦也

重刊巢氏諸病源候總論卷三十二終

重刊巢氏諸病源候總論卷三十三

癰疽病諸候下

凡二十九論

緩疽候

緩疽者由寒氣客於經絡致榮衛涖澀氣血壅結所成其寒盛者則腫結痛深而回回無頭尾大者如拳小者如桃李冰冰與皮肉相親著熱氣少其腫與肉相似不甚赤積日不潰久乃變紫黯色皮肉俱爛如牛領瘡漸至通體青黯下作頭而穿潰膿出是也以其結腫積久而肉腐壞遲故名緩疽亦名肉色疽也

緩疽急者一年殺人緩者數年乃死

身且痲
卷三十三
一
燂疽候

燂疽之狀肉生小黯點小者如粟豆大者如梅李或赤或黑乍青乍白有實核燥痛應心或著身體其著手指者似代指人別者呼爲代指不急治毒逐脈上入藏則殺人南方人得此疾皆截去指恐其毒上攻藏故也 又云十指端忽策策痛入心不可忍向明望之晃晃黃赤或黯黯青黑是燂疽直截後節十有一異 又云風脰痛不可忍者燂疽發五藏俞節解相應通洞燂疽也諸是燂疽皆死又齒間臭熱血出不止燂疽也七日死治所不瘥以灰掩覆其血不爾著人 又云諸是燂疽皆死

唯痛取利十有一活耳此毒氣客於經絡氣血否澀毒變所生也

疽發口齒候

寒氣客於經絡血澀不通結而成疽五藏之氣皆出於口十二經脈有入齒者有連舌本者榮衛之氣無處不行虛則受邪挾毒乘虛而入脈故也其發口齒者多血出不可禁皆死

行疽候

行疽候者發瘡小者如豆大者如錢往來匝身及生面上謂之行疽此亦寒熱客於腠理與血氣相搏所生也

風疽候

腫起流之血脈而攣曲疾痛所以發瘡歷年謂之風疽此由風濕之氣客於經絡與氣相搏所成也

養生方云大解汗當以粉粉身若令自乾者成風疽也

石疽候

此由寒氣客於經絡與血氣相搏血澀結而成疽也其寒毒偏多則氣結聚而皮厚狀如瘞癩韌如石故謂之石疽也

禽疽候

禽疽發如胗者數十處其得四日腫合牢核痛其狀若變十日

可刺其初發身戰寒齒如噤欲坐如是者十五日死也此是寒濕之氣客於肌肉所生也

杼疽候

杼疽者發項及兩耳下不瀉十六日死其六日可刺其色黑見膿如癰者死不可治人年三十九二十三三十五三十九五十一五十五六十一八十七九十九神皆在兩耳下不可見血見血者死此是寒濕之氣客於肌肉折於血氣之所生也

水疽候

此由寒濕之氣客於皮膚搏於津液使血氣否澀濕氣偏多則

發水疽其腫狀如物裏水多發於手足此是隨肌膚虛處而發也亦有發身體數處而狀熱遂至死

肘疽候

肘疽是疽發於肘謂之肘疽凡諸疽發節解並皆斷筋節而發肘者尤爲重也此亦是寒濕之氣客於肌肉折於血氣所生也

附骨疽候

附骨疽者由當風入骨解風與熱相搏復遇冷濕或秋夏露臥爲冷所折風熱伏結壅遏附骨成疽喜著大節解間丈夫及產婦女人喜著鼠牒髀頭脛膝間嬰孩嫩兒亦著髀肘皆脊也其

大人老人著急者則先覺痛不得轉動按之應骨痛經日便覺
皮肉生急洪洪如肥狀則是也其小兒不知字名抱之纔近其
便略喚則是支節有痛處便是其候也大人老人著緩者則先
覺如肥洪洪耳經日便覺痺痛不隨也其小兒則覺四支偏有
不動不動搖者如不隨狀看支節解中則有肥洪洪處其名不
知是隨骨疽乃至合身成膿不潰至死皆覺身體變青黯也其
大人老人皆不悟是疽乃至於死也亦有不別是附骨疽呼爲
急賊風其緩者謂風腫而已

久疽候

此由寒氣客於經絡折於氣血血澀不通乃結成疽凡疽發諸節及府藏之俞則卒急也其久疽者發於身體閑處故經久積年致膿汁不盡則瘡内生蟲而變成瘦也

疽虛熱候

此由寒搏於熱結壅血澀乃成疽疽膿雖潰瘥之後餘熱未盡而血已虛其人喑喑苦熱惒惒虛乏故謂虛熱也

疽大小便不通候

此由寒氣客於經絡寒搏於血血澀不通壅結成疽府藏熱不泄熱入大小便故大小便不通也

癰發背候

夫癰發於背者多發於諸府俞也六府不利則生癰諸府俞皆在背其血氣經絡於身府氣不和腠理虛者經絡爲寒所客寒折於血則壅不通故結成癰發其俞也熱氣加於血則肉血敗化故爲膿癰初結之狀腫而皮薄以澤又云背上忽有赤腫而頭白搖根入應胷裏動是癰也又發背若熱手不可得近者內先服王不留行散外摩背膏大黃貼若在背生破無苦良不得膿以食肉膏散著瓮頭內癰口中人體熱氣欬服朮散五日後癰欲瘥者服排膿內塞散

癰發背潰後候

此由寒氣客於經絡折於血氣血澀不通乃結成癰發背癰膿
出之後眼白睛青黑而眼小一逆也內藥而嘔二逆也傷痛渴
甚三逆也膊項中不仁四逆也音嘶色脫五逆也此等五逆者
皆不可治也或熱或渴非倉卒而急可得漸治之也凡發背則
熱氣流入府藏膿潰之後血氣則虛府藏燥熱渴而引飲飲冷
入腸胃則變下利胃虛氣逆則變嘔也嘔逆若遇冷折之氣不
通則噦也其瘡若膿汁不盡而瘡口早合雖瘡更發惡汁連滯
則變成癭也

癰發背後下利候

此是寒氣客於經絡折於氣血血澀不通乃結成癰癰發後利者由內熱而引飲取冷太過冷入腸胃故令下利不止則變嘔所以然者脾與胃合俱象土脾候身之肌肉胃爲水穀之海脾虛則肌肉受邪胃虛則變下利下利不止氣逆故變嘔嘔而遇冷折氣逆不通則噦也

癰發背渴候

此由寒氣客於經絡折於氣血血澀不通乃結成癰癰發背五藏熱盛虛燥故渴而冷飲入腸胃則變利也

癰發背兼嗽候

肺主氣候於皮毛氣虛腠理受寒客於經則血否澀熱氣乘之則成癰也肺氣虛其寒發乘肺肺感於寒則成欬嗽故發癰而兼嗽也

癰發背大便不通候

此由寒客於經絡血氣否澀則生熱蘊結成癰氣壅在藏府熱入腸胃故令大便不通也

癰發背惡肉不盡候

此由寒氣客於經絡折於血血澀不通乃結成癰發背膿潰之

後外有風氣搏之變生而惡肉壅塞瘡者則毒氣內侵須傳藥以食之

疽發背候

疽發背者多發於諸藏俞也五藏不調則發疽五藏俞皆在背其血氣經絡於身府藏不調腠理虛者經脈爲寒所客寒折於血血壅不通故乃結成疽其發藏俞也熱氣施於血則肉血敗腐爲膿也疽初結之狀皮強如牛領之皮是也疽重於癰發者多死又發起肺俞若肺俞不瀉二十日死其八日可刺也發而赤其上肉如椒子者死不可理人年十九二十五三十三四十

九五十七六十七十三八十一九十七神皆在背不可見血見
血者死 蜂疽發背起心俞若髀髑二十日不瀉卽死其八日
可刺也其色赤黑膿見青者死不治人年六歲十八二十四四
十五十六六十七六十二九十八神皆在髀不可見血見血者
死

疽發背潰後候

此由寒氣客於經絡折於氣血血澀不通乃結成疽發背疽膿
出之後眼白睛青黑而眼小一逆也內藥而嘔二逆也傷痛湯
甚三逆也髀項中不便四逆也音嘶色脫五逆也皆不可治自

餘或熱渴或刺嘔非倉卒之急也可得漸治凡發背則熱氣流入府藏膿潰之後血氣則虛府藏積熱渴而引飲飲冷入於腸胃則變下利胃虛氣逆則變嘔也嘔逆若遇冷折之氣不通卽噦也其瘡若膿汁不盡而瘡口早合雖瘥更發惡汁連滯則變成癭也

疽發背熱渴候

此由寒氣客於經絡折於氣血氣血澀不通乃結成疽疽發背則藏府皆熱熱則藏燥故渴也而冷飲入腸胃則變利也

腸癰候

腸癰者由寒溫不適喜怒無度使邪氣與榮衛相干在於腸內
遇熱加之血氣蘊積結聚成癰熱積不散血肉腐壞化而爲膿
其病之狀小腹重而微強抑之卽痛小便數似淋時時汗出復
惡寒其身皮皆甲錯腹皮急如腫狀診其脈洪數者已有膿也
其脈遲緊者未有膿也甚者腹脹大轉側聞水聲或繞臍生瘡
穿而膿出或膿自臍中出或大便出膿血惟宜急治之 又云
大便膿血似赤白下而寔非者是腸癰也卒得腸癰而不曉治
之錯者殺人寸脈滑而數滑則爲實數則爲熱滑則爲榮數則
爲衛衛下降榮上升遇熱榮衛相干血爲濁敗小腹否擗小便

或難汗出或復惡寒膿爲已成設脈遲緊聚爲瘀血血下則愈
膿成引白又諸浮數脈當發熱而反洗淅惡寒若有痛處者當
積有膿脈滑濇相搏小腸癰出血者也

養生方云六畜卒疫死及夏病者腦不中食喜生腸癰也

內癰候

內癰者由飲食不節冷熱不調寒氣客於內或在胃鬲或在腸
胃寒折於血血氣流止與寒相搏壅結不散熱氣乘之則化爲
膿故曰內癰也胃內痛少氣而發熱以手按左眼而其右眼見
光者胃內結癰也若不見光燦疽內若吐膿血者不可治也急

以灰掩其膿血不爾者著人腸內有結痛或在脅下或在臍左
近結成塊而壯熱必作癰膿診其脈數而身無熱者內有癰
養生方云四月勿食螺雞肉作內癰在胷腋下出瘦孔

肺癰候

肺癰者由風寒傷於肺其氣結聚所成也肺主氣候皮毛勞傷
血氣腠理則開而受風寒其氣虛者寒乘虛傷肺寒搏於血蘊
結成癰熱又加之積熱不散血敗爲膿肺處胷間初肺傷於塞
則微嗽肺癰之狀其人欬胷內滿隱隱痛而戰寒診其肺部脈
緊爲肺癰又肺癰喘而腳滿又寸口脈數而實咽乾口內辟辟

燥不渴時時出濁唾腥臭久久吐膿如粳米粥者難治也又肺
癰有膿而嘔者不須治其嘔膿止自愈又寸口脈微而數微則
爲風數則爲熱微則汗出數則惡寒風中於衛呼氣不入數過
於榮吸而不出風傷皮毛熱傷血脈風舍於肺其人則嘔口乾
喘滿咽燥不渴唾而濁沫時時戰寒熱之所過血爲凝滯蓄結
癰膿吐如米粥始萌可救膿成則死又欲知有膿者其脈緊數
膿爲米成其脈緊去但數膿爲已成又肺病身當有熱欬嗽短
氣唾出膿血其脈當短濇而反浮大其色當白而反赤者此是
火之尅金大逆不治也

偏病候

偏病者由勞役肢體熱盛自取風冷而爲涼濕所折入於肌肉筋脈結聚所成也其狀赤脈起如編繩急痛壯熱其發於腳者患從鼠腭起至踝赤如編繩故謂偏病也發於臂者喜腋下起至手也可卽治取消其潰洗勝則筋攣也其著腳若置不治不消復不潰其熱歇氣不散變作腫緩滯相搏腫腳已成膿也

瘞癰候

瘞癰者由風濕冷氣搏於血結聚所生也人運役勞動則陽氣發泄因而汗出遇風冷濕氣搏於經絡經絡之血得冷所折則

結澀不通而生瘰癧腫結如梅李也又云腫一寸二寸瘰也其
不消而潰者卽宜熟捻去膿至清血出若膿汁未盡其瘡合者
則更發其著耳下領頸腋下若膿汁不盡多變成癭也

養生方云人汗入諸食中食之作癰癧

又云五月勿食不成核果及桃棗發癰癧也

重刊巢氏諸病源候總論卷三十三終

重刊巢氏諸病源候總論卷三十四

瘦病諸候

凡三十五論

諸瘦候

諸瘦者謂瘦病初發之由不同至於瘦成形狀亦異有以一方而治之者故名諸瘦非是諸病共成一瘦也而方脫九瘦者是狼瘦鼠瘦螻蛄瘦蜂瘦蚍蜉瘦蟻螬瘦蜉蝣瘦癩瘦癰瘦轉脈瘦此頸之九瘦也 狼瘦者年少之時不自謹慎或大怒氣上不下之所生也始發之時在於頸項有根出缺盆上轉連耳本其根在肝 鼠瘦者飲食之時不擇蟲疽變化所生也使人寒熱

其根在肺 蝮蝮癩者食果蓏子不避有蟲卽便噉之外絕於
網內絕於腸有毒不去變化所生也始發之時在於頸上狀如
蝸形癰胗而出也其根在大腸 蜂癩者飲食勞倦渴乏多飲
流水卽得蜂毒不去變化所生也始發之時其根在頸歷歷三
四處俱腫以潰生瘡狀如癰形瘡而復移其根在脾 虻蝥癩
者因寒腹中臏脹所得寒毒不去變化所生也始發之時在其
頸項使人壯熱若傷寒有似疥癬婁婁孔出其根在肺 蟻蝥
癩者恐懼愁憂思慮哭泣不止餘毒變化所生也始發之時在
其頸項無頭尾如棗核或移動皮中使人寒熱心滿其根在心

浮疽癭者因毒結馳思往反變化所生也始發之時在於頸
亦在腋下如兩指無頭尾使人寒熱欲嘔吐其根在膽 癰癧
癭者因強力入水坐濕地或新沐浴汗入頭中流在頸上之所
生也始發之時在其頸項恆有膿使人寒熱其根在腎 轉脈
癭者因飲酒大醉夜臥不安驚欲嘔轉側失枕之所生也始發
之時在其頸項濯脈轉身如振使人寒熱其根在小腸 復有
三十六種癭方不可次第顯其名而有蜚蠊蚯蚓等諸癭非九
癭之名此卽應是三十六種癭之數也但癭病之生或因寒暑
不調故血氣壅結所作或由飲食乖節狼鼠之精入於府藏毒

流經脈變化所生皆能使血脈結聚寒熱相交久則成膿而潰漏也其生身體皮肉者亦有始結腫與石癰相似所可異者其腫之中按之累累有數脈喜發於頸邊或兩邊俱起便是癭證也亦發兩腋下及兩顳顬間初作喜不痛不熱若失時治卽生寒熱也所發之處而有輕重重者有兩種一則發口上喙有結核大小無定或如桃李大此蟲之窠窟止在其中二則發口之下無有結核而穿潰成瘡又蟲毒之居或府藏無定故癭發身體亦有數處其相應通者多死其癭形狀起發之由今辯於後

章

養生方云六月勿食自落地五果經宿蚍蜉瘦蛄蜣螂遊上喜
爲九瘦

又云十二月勿食狗鼠殘肉生瘡及瘦出頸項及口裏或生咽
內

鼠瘦候

鼠瘦者由飲食不擇蟲蛆毒變化入於府藏出於脈稽畱脈內
而不去使人寒熱其根在肺出於頸腋之間其浮於脈中而未
內著於肌肉而外爲膿血者易去也決其生死者反其目視之
其中有赤脈從上下貫瞳子見一脈一歲死見一脈半一歲半

死見二脈二歲死見二脈半二歲半死見三脈三歲死赤脈而
不下貫瞳子可治也

養生方云正月勿食鼠殘食作鼠瘦發於頸項或毒入腹下血
不止或口生瘡如有蟲食

蜂瘦候

蜂瘦者由飲食勞倦渴乏多飲流水卽得蜂毒流入於脈其根
在脾出發於頸項厯厯三四處或累累四五處蜂臺或發曾前
俱腫以潰生瘡狀如癰形瘥而復移

蟻瘦

蟻瘦者由飲食有蟻精氣毒入於五藏流出經絡多著頸項戢戢然小腫核細乃遍身體

蚘蝮瘦候

蚘蝮瘦者由飲食內有蚘蝮毒氣入於藏流於經脈使身寒似傷寒腹虛臚脹其根在肺發於頸項如疥癬瘦瘰孔出初生痒搔之生痕不治一百日生蚘蝮瘦

蠅瘦候

此由飲食內有蠅窠子因誤食之入於腸胃流注入血脈變化生癩發於頸下初生痒而而如蠅窠子狀使人寒熱久其中化

生蠅也

蠮螋瘰候

蠮螋瘰者由食果蓏子不避有蟲卽便噉之有蟲毒氣入於腹
內外發於頸其根在大腸初生之時其狀如風矢亦如蝟形癰
胗而痒搔之則引大如四寸更其中生道乃有數十中生蠮螋
亦有十數不治二年殺人

蠮螋瘰候

此由恐懼愁憂思慮哭泣不止氣毒變化所生內動藏外藏於
頸項其根在心又方根在膀胱初生之時無頭尾腫如棗核或

移動皮肉使人寒熱心滿狀似蜂癭而深坎蜂癭則高而圓蟻
螯癭方五寸作阬邊有脣畔而痒搔之則引大如六寸更疼痛
日夜令人呻號三年生孔道乃有十數中生蟻螯乃有百數不
治五年殺人

鵠鳥鶴癭候

鵠鳥鶴癭者初腫如覆手疼痛一年生孔道數十處黃水出二
年化生鶴水鳥首而生口齧是也

尸癭候

人皆有五尸在人腹內發動令心腹脹氣息喘急衝擊心曾攻

刺脇肋因而寒熱頸腋之下結瘰癧膿潰成瘻時還衝擊腹內則脹痛腰脊攣急是也

風癭候

此由風邪在經脈經脈結聚所成或諸瘡得風不卽瘥變作其瘡得風者是因瘡遇冷膿汁不盡乃成也其風在經脈者初生之時其狀如腫有似覆手搔之則皮脫赤汗出乍腫乍減漸漸生根結實且附骨間不知首尾卽潰成瘻若至五十日不消不潰變成石腫名爲石癰久久不治令寒熱惡氣入腹絕悶刺心及咽項悉皆腫經一年不治者死

鞠瘦候

腫痛初生癰如大桃狀亦如瘤膿潰爲瘡不治成石瘦化生鞠作竅傍行世呼爲石鞠瘦

蜚蠊瘦候

此由飲食居處有蜚蠊毒氣入於藏府流於經脈所生也初生之時其狀如鼠竅直下腫如覆手而痒搔之疼痺至百日有十八竅深三寸中生蜚蠊乃有一百數蜚蠊成尾自覆刺人大如盂升至三年殺人

骨疽瘦候

骨疽癭者或寒熱之氣搏經脈所成或蟲蛆之氣因飲食入人
府藏所生以其膿潰侵食於骨故名骨疽癭也初腫後乃破破
而還合邊傍更生如是或六七度中有膿血至日西痛發如有
針刺

蚯蚓癭候

蚯蚓癭者由居處飲食有蚯蚓之氣或飲食入腹內流於經脈
所生其根在大腸其狀腫核潰漏

花癭候

花癭者風濕客於皮膚與血氣相搏因而成瘡風濕氣多其肉

突出外如花開之狀世謂之反花瘡不癢生蟲成瘦故謂之花瘦也

蠍瘦候

此由飲食居處有蠍蟲毒氣入於府藏流於經脈或生腋下或生頸邊腫起如蠍蟲之形寒熱而潰成瘦久則瘡裏生細蠍蟲也

蚝瘦候

蚝瘦者由飲食居處有蚝蟲毒氣入於府藏流於經脈變化而生著面頰邊卽脫肉結腫初如蚝蟲之窠後潰成瘦而蚝生是

也

腦瘦候

腦瘦者頭頸逐氣上下疼痛而後腦瘦

癰瘦候

癰瘦者是癰潰瘡後其不瘥膿汁不盡因變生蟲成瘦故爲癰瘦也

癩瘦候

癩瘦者其瘡橫闊作頭狀如杏子形亦是癩癧處出血是也

蟲瘦候

諸瘻皆有蟲而此獨以蟲爲名者是諸瘡初本無蟲經久不瘥而變生蟲故以爲名也

石瘻候

石瘻之狀初起兩頭如梅李核韌實按之強如石而寒熱熱後潰成瘻是也

蛙瘻候

此由飲食居處有蛙之毒氣入於府藏流經脈而成瘻因服藥隨小便出物狀似蛙形是也

蝦蟆瘻候

此由飲食有蝦蟆之毒氣入府藏流於經脈結腫寒熱因潰成瘻服藥有物隨小便出如蝦蟆之狀故謂之蝦蟆瘻也

蛇瘻候

蛇瘻者由居處飲食有蛇毒氣入於府藏流於經脈寒熱結腫出處無定因潰成瘻服藥有物隨小便出如蛇形狀謂之蛇瘻

螿蠘瘻候

螿蠘瘻者由飲食居處有螿蠘毒氣入府藏流於經脈所生初得之時如棗核許戾契或滿百日或滿周年走不定一處成竅而膿汁潰瘻也故謂之螿蠘瘻

赤白瘰候

人有患瘡色赤白分明因而成瘰謂之赤白瘰

內瘰候

人有發瘡色黑有結內有膿久乃積生侵食筋骨謂之內瘰

雀瘰候

此由居處飲食有雀毒氣入於藏流於脈發無定處腫因潰成瘰服藥有物隨小便出狀如雀聚故謂之雀瘰

膿瘰候

諸瘰皆有膿汁此瘰獨以膿爲名者是諸瘡久不瘥成瘰而重

爲熱毒氣停積生膿常不絕故謂之膿瘻也

冷瘻候

冷瘻者亦是謂瘡得風冷久不瘥因成瘻膿汁不絕故爲冷瘻也

久瘻候

久瘻者是諸瘻連滯經久不瘥或暫瘥復發或移易三兩處更相應通故爲久瘻也

瘰癧瘻候

此由風邪毒氣客於肌肉隨虛處而停結爲瘰癧或如梅李棗

核等大小兩三相連在皮間而時發寒熱是也久則變膿潰成瘻也其湯熨針石別有正方補養宜導今附於後

養生方導引法云踞踞以兩手從曲腳入據地由腳加其上舉尻其可用行氣愈癰瘰乳痛

癩瘻候

癩病之狀陰核腫大有時小歇歇時終大於常勞冷陰雨便發發則脹大使人腰背攣急身體惡寒骨節沉重此病由於損腎也足少陰之經腎之脈也其氣下通於陰陰宗脈之所聚積陰之氣也勞傷舉重傷於少陰之經其氣下衝於陰氣脹不通故

成癩也其湯熨針石別有正方補養宣導今附於後

養生方導引法云正偃臥直兩手兩足念月所在令赤如油囊
丹癩少腹重不便腹中熱但口內氣息出之數十不須小咽氣
卽腸中不熱者七息已溫熱咽之十數

痔病諸候

凡六論

諸痔候

諸痔者謂牡痔牝痔脈痔腸痔血痔也其形證各條如後竟又
有酒痔肛邊生瘡亦有血出又有氣痔大便難而血出肛亦出
外良久不肯入諸痔皆由傷風房室不慎醉飽合陰陽致勞擾

血氣而經脈流液滲漏腸間衝發下部有一方而治之者名爲諸痔非爲諸病共成一痔痔久不瘥變爲癭也

養生方云忍大便不出久作氣痔其湯熨針石別有正方補養宣導今附於後

養生方導引法云一足踏地一足屈膝兩手抱犢鼻下急挽向身極勢左右換易四七去痔五勞三里氣不下

又云踞坐合兩膝張兩足不息兩通治五痔

又云兩手抱足頭不動足向口受氣眾節氣散來去三七欲得捉左右側身各急挽腰不動去四支腰上下髓內冷血冷筋急

悶痔

又云兩足相踏向陰端急蹙將兩手捧膝頭兩向極勢捧之二七竟身側兩向取勢二七前後努腰七去心勞痔病

牡痔候

肛邊生鼠乳出在外者時時出膿血者是也

牝痔候

肛邊腫生瘡而出血者牝痔

脈痔候

肛邊生瘡痒而復痛出血者脈痔也

腸痔候

肛邊腫核痛發寒熱而血出者腸痔也

血痔候

因便而清血隨出者血痔也

重刊巢氏諸病源候總論卷三十四終

重刊巢氏諸病源候總論卷三十五

瘡病諸候

凡六十五論

頭面身體諸瘡候

夫內熱外虛爲風濕所乘則生瘡所以然者肺主氣候於皮毛脾主肌肉氣虛則膚腠開爲風濕所乘內熱則脾氣溫脾氣溫則肌肉生熱也濕熱相搏故頭面身體皆生瘡其瘡初如炮須臾生汗熱甚者則變爲膿隨瘡隨發

頭面身體諸久瘡候

諸久瘡者內熱外虛爲風濕所乘則頭面身體生瘡其藏內熱

實氣盛熱結肌肉其熱畱滯不歇故瘡經久不瘥

諸惡瘡候

諸瘡生身體皆是體虛受風熱風熱與血氣相搏故發瘡若風熱血濕毒之氣者則瘡痒痛焮腫而瘡多汁身體壯熱謂之惡瘡也

養生方云銅器蓋食汗入食發惡瘡內疽也

又云醉而交接或致惡瘡 又云醉酒熱未解以冷水洗面令

惡瘡輕者戲炮 又云五月五日取葉棗三升井華水禱取汁

浴永不生惡瘡 又云井華水和粉洗足不病惡瘡其湯熨針

石別有正方補養宣導今附於後

養生方導引法云龍行氣叩頭下視不息十二通愈風疥惡瘡
熱不能入

又云五月一日八月二日九月九日十月七日十一月四日十
二月十三日沐浴除惡瘡

久惡瘡候

夫體虛受風熱濕毒之氣則生瘡痒痛焮腫多汗壯熱謂之惡
瘡而濕毒氣盛體外虛內熱其瘡漸增經久不瘥爲久惡瘡

癩瘡候

癩瘡者由膚腠虛風濕之氣折於血氣結聚所生多著手足間
遞相對如新生茱萸子痛痒抓搔成瘡黃汁出浸淫生長折裂
時瘥時劇變化生蟲故名癩瘡

燥癩瘡候

膚腠虛風濕搏於血氣則生癩瘡若濕氣少風氣多者其癩則
乾燥但痒搔之白屑出乾枯折痛此毒蟲氣淺在皮膚故名燥
癩瘡也

濕癩瘡候

膚腠虛風濕搏於血氣生癩瘡若風氣少濕氣多其瘡痛痒搔

之汗出常濡濕者此蟲毒氣深在於肌肉內故也

久癩瘡候

癩瘡積久不瘥者由膚腠虛則風濕之氣停滯蟲在肌肉之間則生長常痒痛故經久不瘥

癬候

癬病之狀皮肉隱胗如錢文漸漸增長或圓或斜痒痛有匡郭裏生蟲搔之有汁此肉風濕邪氣客於腠理復值寒濕與血氣相搏則血氣否澀發此疾

按九蟲論云蟻蟲在人腸內變化多端發動亦能爲癬而癬內

實有蟲也

養生方云夏勿露面臥露下墮面皮厚及喜成癬

乾癬候

乾癬但有匡郭皮枯索痒搔之白屑出是也皆是風濕邪氣客於腠理復值寒熱與血氣相搏所生若其風毒氣多濕氣少故風沈入深故無汁爲乾癬也其中亦生蟲

濕癬候

濕癬者亦有匡郭如蟲行浸淫赤濕痒搔之多汁成瘡是其風毒氣淺濕多風少故爲濕癬也其裏亦有蟲

風癬候

風癬是惡風冷氣客於皮折於血氣所生亦作圓文匡郭但抓搔頑痺不知痛痒其裏亦有蟲

白癬候

白癬之狀白色硿硿然而痒此亦是腠理虛受風風與氣并血澀而不能榮肌肉故也

牛癬候

俗云以盆器盛水飲牛用其餘水洗手面卽生癬名牛癬其狀皮厚抓之韌強而痒是也其裏亦生蟲

圓癬候

圓癬之狀作圓文隱起四畔赤亦痒痛是也其裏亦生蟲

狗癬候

俗云狗舐之水用洗手面卽生癬其狀微白點綴相連亦微痒是也其裏亦生蟲

雀眼癬候

雀眼癬亦是風濕所生其文細似雀眼故謂之雀眼癬搔之亦痒中亦生蟲

刀癬候

俗云以磨刀水用洗手面而生癬名爲刀癬其形無匡郭縱斜無定是也中亦生蟲

久癬候

久癬是諸癬有蟲而經久不瘥者也癬病之狀皮肉隱胗如錢文漸漸增長或圓或斜痒痛有匡郭搔之有汁又有乾癬枯索痒搔之白屑出又有濕癬如蟲行浸淫赤濕痒搔之多汁又有風癬搔抓頑痺不知痛痒又有牛癬因飲牛餘水得之其狀皮厚抓之韌強又方圓癬作圓文隱起四面赤又有狗癬因以狗舐餘水洗手面得之其狀微白點綴相連亦微痒又有雀眼癬

作細文似雀眼搔之亦痒痛又有刀癬因以磨刀水洗手面得之其狀無匡郭縱邪無定如此之癬初得或因風濕客於肌膚折於血氣所生或因用牛狗所飲餘水洗手面得之至其病成皆有蟲侵食轉深連滯不瘥故成久癬

疥候

疥者有數種有大疥有馬疥有水疥有乾疥有濕疥多生手足乃至遍體大疥者作瘡有膿汁焮赤痒痛是也馬疥者皮肉隱隣起作根墟搔之不知痛此二者則重水疥者痞癩如小瘰癧摘破有水出此一種小輕乾疥者但痒搔之皮起作乾痂濕疥

者小瘡皮薄常有汁出並皆有蟲人往往以針頭挑得狀如水
內癩蟲此悉由膚皮受風邪熱氣所致也

按九蟲論云蟻蟲多所變化多端或作癩疥痔瘻無所不爲其
湯熨針石別有正方補養宣導今附於後

養生方導引法云龍行氣叩頭下視不息十二通愈風疥惡瘡
熱不能入

乾疥候

乾疥但痒搔之皮起作乾痂此風熱氣深在肌肉間故也

濕疥候

濕疥起小瘡皮薄常有水汁出此風熱氣淺在皮膚間故也

熱瘡候

此陽氣在表陽氣盛則表熱因運動勞役腠理則虛而陽爲風邪所客風熱相搏流於皮膚則生瘡初作癩漿黃汁出風多則痒熱多則痛血氣乘之則多膿血故名熱瘡也

冷瘡候

凡身體發瘡皆是風熱所爲然血虛者亦傷於邪若重觸風寒則冷氣入於瘡令血澀不行其瘡則頑令不知痛痒亦經久難瘥名爲冷瘡

疽瘡候

此疽瘡是癘之類也非癰疽之疽世云癘疽卽是此也多發於支節腳脛間相對而作對孔如針頭其裏有蟲痒痛搔之黃汁出隨癢隨發皆是風邪客於皮膚血氣之所變生亦有因諸淺瘡經久不瘥痒痛抓搔之或衣指拂之其瘡則經久不瘥而變作疽瘡者裏皆有細蟲

甲疽候

甲疽之狀瘡皮厚甲錯剝起是也其瘡亦痒痛常欲抓搔之汁出其初皆是風邪折於血氣所生而瘡裏亦有蟲

查疽候

查疽之狀隱胗赤起如今查樹子形是也亦是風邪客於皮膚血氣之所變生也其瘡內有蟲亦痒痛時焮腫汁出

頑疽候

此由風濕客於皮膚血氣變隱胗生瘡痒而不痛故名頑疽

棖疽候

棖疽是諸雜瘡帶風濕苦痒數以手抓搔棖觸便侵食闊久不瘥乃變生蟲故名棖疽

月食瘡候

月食瘡生於兩耳及鼻面間并下部諸孔竅側侵食乃至筋骨
月初則瘡盛月末則瘡衰以其隨月生因名之爲月食瘡也又
小兒耳下生瘡亦名月食世云小兒見月以手指指之則令病
此瘡也其生諸孔竅有蟲久不瘥則變成癩也

天上病候

天上病者人神采昏塞身體沈重下部生瘡上食五藏甚者至
死世人隱避其名故云天上病也此是府藏虛腸胃之間蟲動
侵食人五藏故也

甜瘡候

甜瘡生面上不痒不痛常有肥汁出汁所溜處隨卽成瘡亦生
身上小兒多患之亦是風濕搏於血氣所生以其不痒不痛故
名甜瘡

浸淫瘡候

浸淫瘡是心家有風熱發於肌肉初生甚小先痒後痛而成瘡
汁出侵潰肌肉浸淫漸闊乃偏體其瘡若從口出流散四支者
則輕若從四支生然後入口者則重以其漸漸增長因名浸淫
也

反花瘡候

反花瘡者由風毒相搏所爲初生如飯粒其頭破則血出便生惡肉漸大有根膿汁出肉反散如花狀因名反花瘡凡諸惡瘡久不瘥者亦惡肉反出如反花形

瘡建候

人身上患諸瘡熱氣盛者腫焮痛附畔別結聚狀如癰癧者名爲瘡建亦名瘡根也

王爛瘡候

王音旺

王爛瘡者由府藏實熱皮膚虛而受風濕與熱相搏故初起作癰漿漸漸王爛汁流浸潰爛故名王爛也亦名王灼瘡其初作

癩漿如湯火所灼也又名洪燭瘡初生如沸湯洒作癩皴赤爛如火燭故名洪燭也

白頭瘡候

白頭瘡者由體虛帶風熱遍身生瘡瘡似大疥痒漸白頭而有膿四邊赤疼痛是也

無名瘡候

此瘡非癰非疽非癬非疥狀如惡瘡或癢或劇人不能名故名無名瘡也此亦是風熱搏於血氣所生也

豬灰瘡候

諸灰瘡者坐處生瘡赤黑有竅深如火豆許四邊青中央坼作
臼陷而不甚痛狀如豬灰因以爲名此亦是風熱搏於血氣所
生也

不痛瘡候

諸瘡久不瘥觸風冷有惡肉則搔針灸不覺痛因以不痛爲名
鴈瘡候

鴈瘡者其狀生於體上如濕癬癩瘍多著四支乃遍身其瘡大
而熱疼痛得此瘡者常在春秋二月八月鴈來時則發鴈去時
便瘥故以爲名亦鴈過荆漢之域多有此病

蜂窠瘡候

其瘡如疽癭之類有小孔象於蜂窠因以爲名此亦風濕搏於血氣之所生也

斷咽瘡候

此瘡繞頸而生皮傷赤若匝頸則害人此亦是風濕搏於血氣之所生也

毒瘡候

此由風氣相搏變成熱毒而生瘡於指節或指頭初似疥發痒經宿乃紫黑也

瓠毒瘡候

俗云人有用瓠花上露水以洗手遇毒卽作瘡因以名之

晦瘡候

其瘡生皆兩兩相對頭戴白膿俗云人有誤小便故竈處卽生此瘡小兒多患也

集瘡候

此瘡十數箇集生一處因以爲名亦是皮膚偏有虛處風濕搏於血氣變生

屋食瘡候

方云犯屋示所爲未詳其形狀

烏啄瘡候

烏啄瘡四畔起中央空是也此亦是風濕搏於血氣之所變生以其如烏鳥所啄因以名之也

攝領瘡候

攝領瘡如癬之類生於頸上痒痛衣領拂著卽劇云是衣領揩所作故名攝領瘡也

雞督瘡候

雞督瘡生脇傍此瘡亦是風濕搏於血氣之所變生以其形似

雞屎因以爲名也

斷耳瘡候

斷耳瘡生於耳邊久不瘥耳乃取斷此亦月食之類但不隨月生長爲異此瘡亦是風濕搏血氣所生以其斷耳因以爲名也

新婦瘡候

此瘡狀繞腰生如蠛蠓屎但不痛爲異耳此瘡亦是風濕搏血氣所生而世人呼之爲新婦瘡也

土風瘡候

土風瘡狀如風疹而頭破乍發乍瘥此由肌腠理疏風塵入於

皮膚故也俗呼之爲土風瘡

逸風瘡候

逸風瘡生則變體狀如癬疥而痒此由風氣散逸於皮膚因名逸風瘡也

甌帶瘡候

甌帶瘡者繞腰生此亦是風濕搏血氣所生狀如甌帶因以爲名又云此瘡繞腰生而則殺人

兔齧瘡候

凡疽發於脛名曰兔齧瘡一名血實瘡又隨月生死蓋月食之

類非脛瘡也尋此瘡亦風濕搏於血氣血氣實熱所生故一名血實又名兔齧瘡者亦當以其形狀似於兔齧因以爲名

血瘡候

血瘡者云諸患風濕搏血氣而生瘡其熱氣發逸瘡但出血者名爲血瘡也

瘡中風寒水候

凡諸瘡生之初因風濕搏血氣發於皮膚故生也若久不瘥多中風冷水氣若中風則噤瘡中冷則難瘥中水則腫也

露敗瘡候

凡患諸瘡及惡瘡初雖因風濕搏血氣蘊結生蒸發皮肉成瘡若觸水露氣動經十數年不瘥其瘡瘀黑作痂如被霜瓠皮瘡肉似斷故名露敗瘡也

瘡惡肉候

諸瘡及癰疽皆是風濕搏血氣血氣蘊結生熱而發肌皮成癰久不瘥者多生惡肉四邊突起而好肉不生此由毒熱未盡經絡尙壅血氣不到故也

瘡瘥復發候

諸惡瘡皆因風濕毒所生也當時雖瘥其風毒氣猶在經絡者

後小勞熱或食毒物則復更發也

漆瘡候

漆有毒人有稟性畏漆但見漆便中其毒喜面痒然後曾臂脛
臑皆悉瘙痒面爲起腫繞眼微赤諸所痒處以手搔之隨手輦
展起赤痞痞癩癩消已生細粟瘡甚微有中毒輕者證候如此
其有重者遍身作瘡小者如麻豆大者如棗杏膿焮疼痛摘破
小定有小瘡隨次更生若火燒漆其毒氣則厲著人急重亦有
性自耐者終日燒煮竟不爲害也

凍爛腫瘡候

嚴冬之月觸冒風雪寒毒之氣傷於肌膚血氣壅澀因卽瘰凍
焮赤疼腫便成凍瘡乃至皮肉爛潰重者支節墮落

夏日沸爛瘡候

盛夏之月人膚腠開易傷風熱風熱毒氣搏於皮膚則生沸瘡
其狀如湯之沸輕者市市如粟粒重者熱汗浸潰成瘡因以爲
名世呼爲沸子也

傷瘡病諸候

凡四論

湯火瘡候

凡被湯火燒者初慎勿以冷物及井下泥尿泥及蜜淋搨之其

熱氣得冷卽卻深搏至骨爛人筋也所以中人湯火後喜攣縮者良由此也

灸瘡急腫痛候

夫灸瘡膿潰已後更焮腫急痛者此中風冷故也

灸瘡久不瘥候

夫灸之法中病則止病已則瘡瘥若病勢未除或中風冷故久不瘥也

針灸瘡發洪候

夫針灸皆是節穴俞募之處若病甚則風氣衝擊於瘡凡血與

氣相隨而行故風乘於氣而動於血血從灸瘡處出氣盛則血不止名爲發洪

重刊巢氏諸病源候總論卷三十五終

重刊巢氏諸病源候總論卷三十六

獸毒病諸候

凡四論

馬嚙踰人候

凡人被馬嚙踰及馬骨所傷刺并馬韁絆勒所傷皆爲毒瘡若腫痛致煩悶是毒入腹亦斃人

馬毒入瘡候

凡人先有瘡而乘馬汗并馬毛垢及馬屎尿及坐馬皮韉並能有毒毒氣入瘡致焮腫疼痛煩熱毒入腹亦斃人

獠狗嚙候

凡獠狗嚙人七日輒一發過三七日不發則無苦也要過百日
方大免耳當終身禁食犬肉及蠶蛹食此發則死不可救矣瘡
未愈之間禁食生魚豬雞膩過一年禁之乃佳但於飲下飯蒸
魚及於肥器中便發若人曾食落葵得犬嚙者自難治若瘡瘥
十數年後食落葵便發

狗嚙重發候

凡被狗嚙瘡忌食落葵及狗肉云雖瘥經一二年但食此者必
重發重發者與初被嚙不殊其獠狗嚙瘡重發則令人狂亂如

獠狗之狀

蛇毒病諸候

凡五論

蛇螫候

凡中蛇不應言蛇皆言蟲及云地索勿正言其名也惡蛇之類甚多而毒有瘥劇時四月中青蛙三角瘡虺白頸大蜴六月七月中竹狩艾蝮黑甲赤目黃口反鈎白蛙三角此皆蛇毒之猛者中人不卽治多死又有赤連黃額之類後有六七種而方不盡記其名水中黑色者名公礪山中一種亦相似不常聞螫人又有鈎蛇尾如鈎能倒牽人獸入水沒而食之又南方响蛇人忽傷之不死終身伺覓其主不置雖百人眾中亦直來取

之惟遠去出百里乃免耳又有蝮蛇長七八尺如船蝮狀毒人必死卽削取船蝮煮汁漬之便瘥但蛇例雖多今皆以青條矯尾白頸艾蝮其毒尤劇大者中人若不卽治一日間舉體洪腫皮肉坼爛中者尙可得二三日也凡被蛇螫第一禁第二藥無此二者有全劑雄黃麝香可預辦故山居者宜令知禁法也又惡蛇螫者人卽頭解散言此蛇名黑帝其瘡冷如凍凌此大毒惡不治一日卽死若頭不散此蛇名赤帝其毒小輕瘡上冷不治故得七日死凡蛇毒未愈禁熱食熱食便發治之依初被螫法也

蝮蛇螫候

凡蝮中人不治一日死若不早治之縱不死者多殘斷人手足
蝮蛇形乃長頭褊口尖頸斑身亦艾斑色青黑人犯之頸腹帖
著地者是也江東諸山甚多其毒最烈草行不可不慎又有一
種狀如蝮而短有四腳能跳來嚙人名曰千歲蝮中人必死然
其嚙人竟卽跳上樹作聲云斫木者但營棺具不可救若云擣
菽者猶可治吳音呼藥爲菽故也

虺螫候

虺形短而褊身亦青黑色山草自不甚多每六七月中午時出

路上喜入車轆中令車轆腹破而子出人侵晨及冒昏行者每
傾意看之其螫人亦往往有死者

青蛙蛇螫候

青蛙蛇者正綠色喜緣樹及竹上自掛與竹樹色一種人看不
覺若入林中行有落人項背上者然自不甚嚙人嚙人必死此
蛇無正形極大者不過四五寸世人皆呼爲青條蛇言其與枝
條同色乍看難覓其尾二三寸色黑者名螭尾毒最猛烈中人
立死

蝮毒候

此是諸毒蛇夏日毒盛不泄皆嚙草木及吐毒著草木上人誤犯著此者其毒如被蛇螫不殊但瘡腫上有物如蟲蛇眼狀以此別之名爲蝮毒

雜毒病諸候

凡十四論

蜂螫候

蜂類甚多而方家不具顯其名惟地中大土蜂最有毒一螫中人便卽倒悶舉體洪腫諸藥治之皆不能卒止舊方都無其法雖然不肯殺人有禁術封唾亦微効又有瓠瓢蜂抑亦其次餘者猶瘥

蠍螫候

此蟲五月六月毒最盛云有八節九節者彌甚螫人毒勢流行多至牽引四支皆痛過一周時始定

蠱螫候

陶隱居云蠱蟲方家亦不能的辯正云是蠹蜓子或云是小烏蟲尾有兩歧者然皆恐非也疑卽是蠍蠍尾歧而曲上故周詩云彼都人士卷髮如蠶

蜈蚣螫候

此則百足蟲也雖復有毒而不甚螫人人誤觸之者故時有中

其毒

蜈蚣著人候

江東及嶺南無處不有蜈蚣蜈蚣乃是兩種物蜈者在草裏名爲山蜈在水裏名馬蜈皆長四五寸許黑色身滑人行涉山水卽著人肉不甚痛而痒兩頭皆能啣人血血滿腹便自脫地無甚毒害蜈者無不背作文理粗澀多著龜螺殼上若著人肉卽於肉裏生子乃至十數枚經日便腫痒隱軫起久久亦成瘡癩

石蛭螫人候

山中草木及路上石上石蛭著人則穿嚙肌皮行人肉中浸淫

起瘡灸斷其道則愈凡行山草之中常以膏和藥塗足脛則蛭
不得著人

蠶嚙候

蠶既是人養之物性非毒害之蟲然時有嚙人者乃令人增寒
壯熱經時不瘥亦有因此而致斃斯乃一時之怪異救解之方
愈

甘鼠嚙候

此卽鼯鼠也形小而口尖多食傷牛馬不甚痛云其口甜故名
甘鼠時有嚙人者

諸魚傷人候

魚類甚多其鮪魮鮓之徒鬻骨芒刺有毒傷人則腫痛

惡颯嚙候

颯房中切

惡颯一名滿大如毒蟬似蝗無尾前有兩角觸後則傍後觸前則卻行生於樹皮內及屋壁間又喜在紙書內圓似榆莢其色赤黑背橫理二月生十月蟄螫人唯以三時五月六月七月尤毒初如炮狀中央紫黑大如粟粒四傍微腫焮焮色赤或有青色者痒喜搔之若飲酒房室近不過八九日遠不過十餘日爛潰爲膿汁亦殺人

狐尿刺候

此是野狐尿棘刺頭有人犯之者則多中於人手指足指腫痛
焮熱有端居不出而著此毒者則不必是狐尿刺也蓋惡毒氣
耳故方亦云惡刺毒者也

蚝蟲螫候

此則樹上蚝蟲耳故名蚝蟲此毒以其毛刺能螫人蓋輕不至
深斃然亦甚痛螫處作軫起者是也

蠖蝮尿候

蠖蝮蟲云能尿人影卽令所尿之處慘痛如芒刺亦如蚝蟲所

螫然後起細瘡癩作聚如茱萸子狀其瘡癩徧赤中央有白膿如粟粒亦令人皮肉拘急惡寒吐熱極者連起多著腰脇及脅若繞腰匝徧者重也

入井冢墓毒氣候

凡古井冢及深阬穽中多有毒氣不可輒入五月六月間最甚以其鬱氣盛故也若事輒必須入者先下鷄鴨毛試之若毛旋轉不下卽是有毒便不可入

金瘡病諸候

凡二十三論

金瘡初傷候

夫被金刃所傷其瘡多有變動若按瘡邊乾急肌肉不生青黃
汁出瘡邊寒清肉消臭敗前出赤血後出黑血如熟爛骨及血
出不止白汁隨出如是者多凶若中絡脈髀內陰股天聰眉角
橫斷腓腸乳上及與鳩尾攢毛小腹尿從瘡出氣如賁豚及腦
出諸瘡如是者多凶少愈診金瘡血出太多其脈虛細者生數
實大者死小者生浮大者死所傷在陽處者去血四五斗脈微
緩而遲者生急疾者死

金瘡血不止候

金瘡血出不斷其脈大而止者三七日死金瘡血出不可止前

赤後黑或黃或白肌肉腐臭寒冷踴急者其瘡難愈亦死

金瘡內漏候

凡金瘡通內血多內漏若腹脹滿兩脇脹不能食者死瘀血在內腹脹脈牢大者生沈細者死

毒箭所傷候

夫被弓弩所傷若箭鏃有崗藥入人皮膚令人短氣須臾命絕口噤唇乾血爲斷絕腹滿不言其人如醉未死之間爲不可治若榮衛青瘀血應時出瘡邊溫熱口開能言其人乃活毒箭有三種嶺南夷俚用焦銅作箭鏃次嶺北諸處以蛇蟲毒熬物汁

著管中漬箭鏃此二種纔傷皮便洪腫沸爛而死唯射豬犬雖困得活以其噉糞故也人若中之便卽食糞或飲糞汁并塗瘡卽愈不爾須臾不可復救茵箭著寬處者雖困漸治不 死若近胷腸便宜速治小緩毒入內則不可救

金瘡腸出候

此謂矛箭所傷若中於腹則氣激氣激則腸隨瘡孔出也

金瘡腸斷候

夫金瘡腸斷者視病深淺各有生死腸一頭見者不可連也若腹痛短氣不得飲食者大腸一日半死小腸三日死腸兩頭見

者可速續之先以針縷如法連續斷腸便取雞血塗其際勿令氣泄卽推內之腸但出不斷者當作大麥粥取其汁持洗腸以水漬內之當作研米粥飲之二十餘日稍作強糜食之百日後乃可進飲耳飽食者令人腸痛決漏常服錢屑散若腸腹冊翮從瘡出有死者有生者但視病取之各有吉凶冊出如手其下牢核煩滿短氣發作有時不過三日必死冊下不畱安足不煩喘息如故但瘡痛者當以生絲縷繫其血脈當令一宿乃可截之勿閉其口膏稍導之

金瘡筋急相引痛不得屈伸候

夫金瘡愈已後肌肉充滿不得屈伸者此由傷絕經筋榮衛不得循行也其瘡雖愈筋急不得屈伸也

金瘡傷筋斷骨候

夫金瘡始傷之時半傷其筋榮衛不通其瘡雖愈合後仍令痺不仁也若被瘡截斷諸解身軀肘中及腕膝髀若踝際亦可連續須急及熱其血氣未寒碎骨便更縫連其愈後直不屈伸若碎骨不去令人痛煩膿血不絕不絕者不得安諸中傷人神十死一生

箭鏃金刃入肉及骨不出候

箭鏃金刃中骨骨破碎者須令箭鏃出仍應除碎骨盡乃傳藥
不爾瘡永不合縱合常疼痛若更犯觸損傷便驚血沸漬有死
者

金瘡中風瘵候

夫金瘡瘵者此由血脈虛竭飲食未復未滿月日榮衛傷穿風
氣得入五藏受寒則瘵其狀口急背直搖頭馬鳴腰爲反折須
臾干發氣息如絕汁出如雨不及時救者皆死凡金瘡卒無汁
者中風也邊自出黃汁者中水也並欲作瘵急治之又痛不在
瘡處者傷經絡亦死

金瘡驚腫候

夫金瘡愈閉後忽驚腫動起糜沸跳手大者如盂小者如盃名爲盜血此由肌未定裏不滿因作勞起早故令盜血涌出在人皮中不肯自消亦不成膿反牢核又有加血加血者盜血之滿也其血凝深不可妄破破之者盜血前出不可噤止加血追之出卽滿瘡中便畱止令人短氣須臾命絕

金瘡因交接血驚出候

夫金瘡多傷經絡去血損氣其瘡未瘥則血氣尙虛若因而房室致情意感動陰陽發泄驚觸於瘡故血汁重出

金瘡驚悸候

金瘡失血多者必驚悸以其損於心故也心主血血虛則心守不安心守不安則喜驚悸悸者心動也

金瘡煩候

金瘡損傷血氣經絡空虛則生熱熱則煩痛不安也

金瘡欬候

金瘡傷血損氣氣者肺之所主風邪中於肺故欬也

金瘡渴候

夫金瘡失血則經絡空竭津液不足腎藏虛燥故渴也

金瘡蟲出候

夫金瘡久不瘥及裏縛不如法瘡內敗壞故生蟲也

金瘡著風候

夫金瘡乾無汁亦不大腫者中風也寒氣得大深者至藏便發作瘻多凶少愈中水者則腫多汁或成膿

金瘡著風腫候

此由瘡著於風風氣相搏故腫也

金瘡成癰腫候

夫金瘡冬月之時衣厚絮溫故裏欲薄夏月之時衣單日涼故

裏欲厚重寒傷榮重熱傷衛筋勞結急肉勞驚腫骨勞者沸難
可屈伸血脈勞者變化作膿榮衛不通畱結成癰凡始縫其瘡
各有縱橫鷄舌隔角橫不相當縫亦有法當次陰陽上下逆順
急緩相望陽者附陰陰者附陽腠理皮脈復令復常但亦不曉
略作一行陰陽閉塞不必作膿榮衛不通畱結爲癰晝夜不臥
語言不同碎骨不去其人必凶鷄舌隔角房不相當頭毛解脫
忘失故常瘡不再縫膏不再漿

金瘡中風九候

夫金瘡裹縛不密爲風水氣所中則疼痛不止而腫痛内生青

黃汁

金瘡下血虛竭候

金刃中於經絡者下血必多府藏空虛津液竭少無血氣榮養故須補之

金瘡久不瘥候

夫金瘡有久不瘥者膿汁不絕肌肉不生者其瘡內有破骨斷筋伏血腐肉缺刃竹刺久而不出令瘡不愈喜出青汁當破出之瘡則愈

腕傷病諸候

凡九論

被打頭破腦出候

夫被打陷骨傷頭腦眩不舉戴眼直視口不能語咽中沸聲如
狔子喘口急手爲妄取日不死三日小

疑有脫誤

腕折破骨傷筋候

凡人傷折之法卽夜盜汗者此髓斷也七日死不汗者不死

卒破損瘀血候

夫有瘀血者其人喜忘不欲聞物聲令人胃滿唇萎舌青口燥
但欲漱水不欲咽無熱脈微大來遲腹不滿其人言我腹滿爲
有瘀血汗當出不出內結亦爲瘀病人胃滿口乾髀痛渴無寒

熱爲弱瘀血腹滿口燥不渴唾如漿狀此有留血爾從高頓仆
內有血腹脹滿其脈牢強者生小弱者死得咎掠內有結血脈
實大者生虛小者死其湯熨針石別有正方補養宣導今附於
後

養生方導引法云端坐生腰舉左手仰掌以右手承右脇以鼻
內氣自極七息除瘀血結氣 又云鼻內口閉有極七息除兩
脇下積血氣 又云端坐生腰舉左手右手承右脇鼻內氣七
息除瘀血 又云端坐右手持腰鼻內氣七息左右戾頭各三
十止除體瘀血項頸痛 又云雙手搦腰手指相對向盡勢前

後振搖二七又將手大指向後極勢振搖二七不移手上下對
與氣下盡勢來去三七去雲門腰腋血氣閉塞

壓迫墜墮內損候

進音責

此爲人卒被重物壓迫或從高墜下致吐下血此傷五內故也

腕傷初繫縛候

夫腕傷重者爲斷皮肉骨髓傷筋脈皆是卒然致損故血氣隔
絕不能同榮所以須善繫縛按摩導引令其血氣復

被損久瘀血候

此爲被損傷仍爲風冷搏故令瘀血結在內久不瘥也

腕折中風痙候

夫腕折傷皮肉作瘡者慎不可當風及自扇若風入瘡內犯諸經絡所致痙痙者脊背強直口噤不能言也

腕折中風腫候

此爲風入瘡內而不入經絡其搏於氣故但腫也

刺傷中風水候

此爲竹木所刺傷其瘡中風水者則腫痛乃至成膿

重刊巢氏諸病源候總論卷三十六終